

讀冊伴

清彩：誰人會當了解，做學生的悲哀，暗暗流著目屎，也是激假笑哈哈 hai，
啊～來來來來考試，鉛筆若是振動，毋管欲考佢一項，共伊當做眠夢...

頂真：上台閣唱歌！歡喜閣 Happy 喔～

清彩：無～妳叫做頂真，啊～做代誌若有外頂真？

頂真：按怎啦？妳是食著火藥？聲嗽遮粗攏袂笑？

清彩：我的心情咧落雨，妳無來相照顧，閣嫌我講話遐呢粗？無禮貌！

頂真：啊～禮貌，咱猶袂共逐家請安問好咧！

清彩：清彩啦！

頂真：嘿嘿！伊叫做清彩！

清彩：啊～伊號做頂真！

合：逐家好！

清彩：若莫讀冊，我心情就會較好！

頂真：原來，是些項代誌喔！人～古早人講：人無讀冊，毋捌義理。

清彩：欸！古早人嘛講：讀冊、讀冊，愈讀愈感。

頂真：古早人閣講：有讀冊講道理、有教示講規矩、粗魯人烏白指 kī。

清彩：我嘛閣有古早人講：冊免讀遐濟 tsuē，大官無通著咱做 tsuè。

頂真：欸！無～冊，是佢位去礙 gāi 著妳啊？

清彩：妳拄才講：有讀冊講道理，妳聽我講理，足濟人攏無愛讀冊！

頂真：足濟人？

清彩：講英語的，無愛讀冊！

清彩：英語，「冊」按怎講？

頂真：Book！

清彩：妳看，不可啦！閣有，華語號做 - 『書』！逐家嘛欲贏，siáng 欲輸！
著無？

頂真：妳這歪理啦！

清彩：彼冊攏嘛，死去的人講的話，背彼欲創啥？

頂真：冊裡攏是以前累積的智慧。閣再講：花 hua 開在春天 thian，求學在少年 liân。咱就愛；三更燈火，五更雞。

清彩：正是男兒讀書時！妳看；咱查某囡仔，免讀！哼！經驗值幾元？

頂真：按呢～我昨昏借妳，彼本電動過關的秘笈 pì-kip 還我！彼寫經驗，無效
啦！

清彩：啊～這...

頂真：妳嘛莫按呢！我嘛才些改贏妳兩分，頭一遍提一名的，以前～我考輸妳遐濟遍，我抑攏無受氣、變面！嘛是共妳當做，上好的朋友啊！啊～妳咧！哼！

清彩：啊～我...我...我真正是；捌字母捌理、了錢閣了米。冊攏讀對尻脊餅去。妳～原諒我啦！好朋友，莫受氣啦！

頂真：冊，就死人寫的，讀欲創啥？

清彩：無啦！無啦！我音發了母著去，是詩人 si-jîn 寫的啦！

頂真：冊都，愈讀愈感。敢母是？

清彩：無 náo！字是隨身寶、財是國家珍。讀書須用心，這～一字值千金。

頂真：讀冊；母是為著考試的分數！

清彩：是欲予咱行上智慧的大路！

頂真：妳的反應，實在有夠好呢！

清彩：抑無，哪有法度定定考第一名？

頂真：Oó！按呢，我愛提出實力恰妳拚！

清彩：咱互相鼓勵，讀出好名聲！

頂真：好！

清彩：我拄才，足驚妳無愛，閣恰我做好朋友的！

頂真：我進前考無好，妳咧共我鼓勵，講了足好啊！

清彩：佗一遍？

頂真：彼遍，妳毋是講；共袂曉的題目，當作電動猶拍袂過彼關，認真學、認真問，會曉了後，就像電動過關全款，足有成就感的！

清彩：喔～著啦！老師按呢共我教，講；那按呢想，讀冊就那咧□退咧，誠心適！

頂真：感謝這位讀冊伴

清彩：予我讀冊袂孤單

頂真：兩人相招做夥看

清彩：互相依倚有靠山

頂真：祝福逐家

清彩：攏有遮好的

合：讀冊伴！